

Pamahayag 2: Kanunay nga adunay yano ug direkta nga mga tubag sa mga pangutana mahitungod sa doktrina, mga pagtulon-an, mga palisiya, ug kasaysayan sa Simbahan.

Isip usa ka grupo, hisgoti ang katukma sa pamahayag 2. Basaha ang 1 Nephi 11:14–17, ug hisgoti ang kamahinungdanon sa tubag ni Nephi ngadto sa pangutana sa Espiritu. Dayon basaha ang mosunod nga mga pamahayag:



Ang sukaranan nga mga pagtulon-an sa gipahiuli nga ebanghelyo gamhanan, klaro, ug dili kadudahan. Apan, bisan ang mga kasulatan adunay pagkadili tin-aw. Hunahunaa, sama pananglit, ang istorya ni Nephi, kinsa gisugo sa pagpatay kang Laban aron makuha ang usa ka importante kaayo nga espirituhanon nga rekord. Kana nga sitwasyon puno sa kawalay kasegurohan. . . .

Mao nga ang kinabuhi puno sa kawalay katin-awan ug ang pagkat-on sa pagsagubang sa gintang tali sa ideyal ug sa tinuod mao ang usa ka katuyoan sa mortal nga plano. Pinaagi sa balaanon nga plano, kitang tanan mag-atubang og “katugbang sa tanan nga mga butang” (2 Nephi 2:11). . . .

. . . Ang abilidad nga makaila sa kawalay katin-awan, usa ka importante nga lakang sa atong espirituhanon nga paglambo, dili usa ka katapusan nga matang sa paglamdag—kini lamang ang sinugdanan. . . .

Ang labing maayong tubag sa gintang tali sa [kasegurohan ug] kawalay kasegurohan mao ang pagpadayon sa paglambo. . . .

Kon kita makasugat sa unang mga sorpresa sa kakomplikado, kinahanglan natong atimanon ang miturok nga binhi sa hugot nga pagtuo uban ang dakong pakabana, aron kon init kaayo ang adlaw, ang linghod nga tanom dili mamatay. (Bruce C. Hafen ug Marie K. Hafen, *Faith Is Not Blind* [2018], 9–10, 13–14, 18)



Ang pagkat-on pinaagi sa hugot nga pagtuo sama kaimportante sa pagkat-on pinaagi sa pagtuon, tungod kay adunay ubang mga butang nga dili nato makat-onan gikan sa usa ka libro.

Si Elder Dallin H. Oaks mihatag og gibug-aton niini nga kamatuoran: “[H]uman [sa atong tanang] mamantala, usahay ang atong mga miyembro dunay importanting mga pangutana nga dili masulbad pinaagi sa pagtuon. . . . Ang ubang butang makat-onan lamang pinaagi sa hugot nga pagtuo [tan-awa sa Doktrina ug mga Pakigsaad 88:118].

Ang saligan gyod nato sa tanan mao ang atong hugot nga pagtuo sa saksi nga atong nadawat gikan sa Espiritu Santo” [“Oposisyon sa Tanang mga Butang,” *Liahona*, Mayo 2016, 117]. . . .

. . . Kon motumaw ang mga pangutana . . . kini dili timailhan nga kamo walay pagpamatuod o nga ang ebanghelyo dili tinuod. Kini usa ka pagdapit alang kaninyo aron molambo sa espirituhanon nga paagi. . . .

. . . Ang mga pangutana, ilabi na ang mga lisod, motabang kanato sa pagsinati og espirituhanon nga pakigbisog aron ang Ginoo makagiya kanato diha sa dalan sa pakigsaad. . . .

Ang paglambo sa espirituhanon nga paagi ug ang pagdawat og mga tubag sa atong mga pangutana nagdepende sa atong abilidad nga mobati, maminaw, ug mosabot sa mga paghunghong sa Espiritu. Bililhon ang pagsinati og espirituhanon nga pagkigbisog aron makakat-on sa pagdawat og personal nga pagpadayag, tungod masayod lamang kita sa unsay tinuod kon ang Espiritu mopamatuod sa atong mga kasingkasing ug mga hunahuna sama nga ang Espiritu Santo lamang ang makabuhat. (Sheri Dew, “Will You Engage in the Wrestle?” [Debosyonal sa Brigham Young University–Idaho, Mayo 17, 2016], byui.edu)

Hisgoti ang mosunod nga mga pangutana:

- Ngano man nga importante nga makaamgo nga mahimong adunay kawalay katin-awan, kawalay kasegurohan, ug kakomplikado sa pipila sa atong mga pangutana bahin sa doktrina, mga pagtulon-an, mga palisiya, ug kasaysayan sa Simbahan?
- Sumala ni Elder ug Sister Hafen ug Sister Dew, unsa ang pipila ka mabungahon nga mga paagi sa pagtubag sa lisod nga mga pangutana sa ebanghelyo ug sa kinabuhi nga moresulta sa kawalay katin-awan o kakomplikado?
- Unsa ang labing nakatabang kaninyo nga magpabiling matinud-anon sa inyong hugot nga pagtuo kang Jesukristo ug sa Iyang ebanghelyo sa dihang nakasinati kamo og kawalay katin-awan, kawalay kasegurohan, ug kakomplikado?

Base sa unsay inyong nakat-onan atol niini nga panaghisgotan, irekord ang usa ka giusab nga bersiyon sa pamahayag 2. Pangandam sa pagpakigbahin sa inyong giusab nga pamahayag ug sa unsay inyong nakat-onan ngadto sa inyong klase.